



# PRIMEIRO MINISTRO


VII Governo Constitucional

Gabinete do  
Primeiro-Ministro

Dili, Iorom 6 fulan-novembru tinan 2017

## KOMUNIKADU IMPRENSA

### Primeiru-Ministru fila hikas husi vizita dahuluk serbisu nian ba Perth-Austrália



Primeiru-Ministru, Mari Alkatiri, ohin, ho nia delegasaun fila hikas husi Austrália hafoin hala'o tiha vizita serbisu nian husi Iorom 2 to'o Iorom 5 fulan-novembru, ba sidade Perth.

Durante Iorom rua nia laran, Primeiru-Ministru partisipa iha Konferénsia Rejionál Ázia-Pasífiku ne'ebé partisipa mós husi Prezidente Alemaña, Primeiru-Ministru Austrália, reprezentante rejionál lubun ida, no mós kompañia boot-boot husi Alemaña ho Austrália nian.

Sai nu'udar oradór prinsipál ba Konferénsia ne'e maka Prezidente Alemaña ho Primeiru-Ministru Austrália. Iha abertura eventu ida ne'e nian, Primeiru-Ministru Mari Alkatiri iha ninia intervensaun hato'o kona-bá poténsia minarai, gás no minerál sira ne'ebé Timor-Leste bele ofereše ba investidór internasionál sira. Xefe Ezekutivu ne'e hatutan mós kona-ba

Timor-Leste nia intensaun atu investe maka'as iha Turizmu, Agrikultura ho Peskas nu'udar poténsia ida hodi diversifikasi ita-nia ekonomia no lori empregu ne'ebé ho kualidade moris di'ak nian ba Timoroan sira.

Iha marjen konferénsia ida ne'e nian, Xefe Governu halo mós enkontru bilaterál ho Primeiru-Ministru Austrália, Malcolm Turnbull. Iha sorumutuk ne'e, lider na'in rua ne'e ko'alia kona-ba situasaun bilaterál atuál liuliu kona-ba dezenvolvimentu pozitivusira iha negosiasaun marítima no kona-ba oferta ró foun rua husi Austrália ba Timor-Leste atu reforsa pais ne'e ninia kapasidade patrullamentu iha tasi nian liuliu iha Tasi Mane.

Primeiru-Ministru, Mari Alkatiri, hatete "sorumutuk ne'e la'o di'ak tebes, hanesan sinál konfiansa foun ida entre rai rua ne'e hafoin ita asina tiha akordu ba rekursu sira no ketan-tasik (fronteira marítima). Xefe Ezekutivu Austrália nian mós haksolok ho prosesu kontinuasaun no maturidade política Estadu nian ne'ebé sai nu'udar foku ba governu nia programa ba Timor-Leste".



# PRIMEIRO MINISTRO

Gabinete do  
Primeiro-Ministro

Na'i Ulun Governu nian ne'e, hala'o mós sorumutuk ho reprezentante empreza sira maka hanesan Empreza Woodside ho Conocophillips. Iha sorumutuk rua ne'e, ko'alia liu kona-ba poténsia sira investimentu nian iha Tasi Timor, liuliu, kona-ba indústria downstream bainhira ita dezenvolve rekursu sira iha Greater Sunrise.

"Iha enkontru rua ne'e ha'u hato'o ba sira ha'u-nia konfiansa totál ba ita-nia xefe negosiadór, Xanana Gusmão, ho nia ekipa tomak. Asuntu ida ne'e hanesan interesse nacionál, ita tenke hamutuk no tenke hatudu katak, Estadu ne'e prosesu kontínuo ida", tenik Primeiru-Ministru.

"Timor-Leste foin simu oferta ró foun rua husi Austrália. Daudaun ne'e ita-nia ketan tasik luan liután, ita tenke iha mós kapasidade atubele defende ita-nia rekursu sira liuliu, hasoru peska illegál iha ita-nia tasi", Nia hatutan lia hirak ne'e, hafoin halo tiha vizita ba fábrika ne'ebé daudaun ne'e halo hela ró atu oferece mai Timor-Leste.

Akordu Kooperasaun ida ne'e importante tebtebes tanba ró hirak ne'e foun. Austrália sei fó formasaun ba ita-nia rekursu umanu sira atubele hala'o operasaun no kompromete katak, durante tinan 30 oin mai, sei hala'o manutensaun kompletu ba ró rua ne'e iha Austrália. Timor-Leste sei responsabiliza de'it ba despezasira kona-ba saláriu no combustivel.

Programa vizita ne'e remata bainhira Primeiru-Ministru halo jantar traballu nian ida ho Ministru Finansas, Senadór Mathias Cormann, ezekutivu Kleber, ho TL Cement. Iha jantar ne'e, sira ko'alia kona-ba poténsia investimentu iha Timor-Leste. Senadór Cormann hatudu nia interesse atu vizita Timor-Leste iha tempu badak nia laran atu nune'e bele haree di'ak liután setór no área sira ne'ebé governu hanoin atu investe no dezenvolve.

Halo parte iha delegasaun Primeiru-Ministru nian ne'e, Ministru Estadu no Ministru Agrikultura no Peskas, Estanislau da Silva; Ministru Estadu no Ministru Adjunto Primeiru-Ministru, Agio Pereira; Embaixadór Timor-Leste nian ba Austrália, Abel Guterres no Xefe Gabinete/Asesór Diplomátiku, Nélson Santos.**REMATA**